

30 AUG 1997

Perutusan

PERUTUSAN TAHNIAH SEMPENA HARI MERDEKA

KUALA LUMPUR, 30 Ogos (Bernama) -- Perutusan tahniah diterima dengan banyaknya ketika Malaysia akan menyambut Hari Kebangsaan kali ke-40 esok.

Perdana Menteri Tonga, Baron Vaea dalam perutusannya kepada Perdana Menteri Datuk Seri Dr Mahathir Mohamad berdoa agar Malaysia akan terus menikmati kemakmuran dan keamanan.

Beliau juga berharap hubungan persahabatan antara kedua-dua negara akan diterus dan dipertingkatkan bagi mencapai matlamat masing-masing.

Sementara Perdana Menteri Tuvalu, Bikenibeu Paeniu dalam perutusannya kepada Dr Mahathir berkata negaranya menghargai hubungan erat antara kedua-dua negara itu.

"Berdasarkan pencapaian ekonomi Malaysia membolehkan rakyat dan kerajaan saya melihat ke hadapan bagi mengadakan kerjasama dengan kerajaan negara ini dalam bidang latihan dan pendidikan dan aktiviti pertukaran," katanya.

Setiausaha Agung DAP, Lim Kit Siang dalam perutusannya menggesa kerajaan melancarkan kempen "IT Untuk Semua" bagi membantu rakyat Malaysia menyertai dan bersaing dalam Revolusi Maklumat.

"Perkara paling kritikan dalam Era Maklumat kepada negara yang perlu digariskan ialah Malaysia tidak akan mencapai objektif Wawasan 2020 sepenuhnya jika gagal menguasai era digital, yang mengubah Malaysia dari negara berlandaskan industri kepada berlandaskan maklumat," katanya.

Presiden Aliran, Encik P.Ramakrishnan berkata setiap rakyat negara ini seharusnya berbangga menjadi rakyat Malaysia dan membesar dengan mengecapi keamanan, toleransi, prihatin, kerja keras dan inovatif.

Katanya pemimpin lepas dan pada masa kini banyak menyumbangkan kepada kejayaan yang dikecapi itu. -- BERNAMA

HT MS AHH